

مصطفى محمود



جنتيم الصغرى



دارالمعارف

مصطفى محمود

جبرئيل الصغيرى

مسرحية من فصلين



دار المعارف

إهداء

إلى الكن والمودة والرحمة

.. إلى زوجهتي

.. زينب

مصطفى محمود

شخصيات المسرحية

- | | |
|--|---------------------------------|
| ٤٥ سنة صاحب شركة مقاولات - مليونير . | المقاول أحمد الشهاوى |
| ٤٠ سنة . | الشريك (مذكور) |
| ٤٠ سنة رجل أنيق يهتم كثيراً بهندامه . | الصديق (فؤاد) |
| ٣٥ سنة امرأة جميلة ذات أنوثة فياضة . | الزوجة (نعمت) |
| ١٨ سنة . | الابن (رؤوف) |
| ١٩ سنة . | الابنة (دينا) |
| ٢٥ سنة شاب من جيل الديسكو . | خطيب الابنة (سامح) |
| ٥٠ سنة . | المستشار القانونى (الأستاذ مطر) |
| ٣٥ سنة امرأة رقيقة مرهفة فنانة حتى أطراف أناملها . | عازفة الأورج (جانيت) |

الفصل الأول

المشهد الأول

منزل المقاول المليونير أحمد الشهاوى - فى ليلة عيد ميلاده
الـ ٤٥ .

قاعة الاستقبال الفخمة تسبح فى أضواء النجف الكريستال .
موائد عليها تورتات وشموع .. جمع من العائلة والأصدقاء ..
جميع شخصيات المسرحية بين جلوس أو وقوف .. نصفيق ..
ضحك .. تهريج .. قبلات على خد أحمد الشهاوى من
الأبناء والأصدقاء .. أيدى تمتد إلى التوست والكثوس ..
البعض يأكل .. البعض يشرب .. موسيقى .. عزف على
الأورج من العازفة جانيث .

أحمد : هايل يا جانيث .. إيه الفن ده كله .
دينا : (تقبل أبها) مبروك يا بابى عقبال كل سنة .
رؤوف : (يقبل يد أبيه وخذه) مبروك يا بابا عقبال ميت سنة .
مذكور : خليههم ألف عشان خاطرى .

فؤاد : ربنا قادر يخليهم ألف .
د. توفيق : وحصل فعلاً . . أيام نوح كانت الناس بتعيش
بالألف سنة .

أحمد : متشكر قوى على مهلكم يا جماعة . . انتو بتدعوا لى
والآ بتدعوا على .

مذكور : بندعى للبلد يا أحمد بك . . ده كل يوم زيادة فى
عمرك معناها مكسب للبلد . . معناها تعمير وإنشاء
وكبارى وطرق وعمارات سكنية ومشاريع أمن
غذائى . . أنت ثروة وطنية يا أحمد بك . . ثروة
وطنية .

أحمد : الله يخليك (بأكل قطعة نورته) .

فؤاد : (لأحمد) ما تنزلش على التورته كده يا أخى . . إيه
الطفاسة دى . . إنت ناسى أوامر الدكتور .

د. توفيق : خليه يخبص له يوم .

أحمد : الحمد لله إن خبصنا جه فى التورته بس . . أحسن
من خبص بعضهم .

مذكور : بعضهم دول مين بقى يا أحمد بك .

أحمد : الملى عارفين نفسهم والعارف لا يعرف .

مذكور : إيه دى . . الغاز دى والآ إيه . .

(دينا ورؤوف وبعض الحاضرين يطفئون الشموع) .

(غناء جماعى لعيد الميلاد «سنة حلوة يا جميل» تصاحبه الموسيقى
مقطوعة موسيقية مرحة على الأورج من العازفة جانيت . . نواها
تعزف وهى ترقص من الانفعال نرى دينا هى الأخرى تندمج
وترقص بصاحبها سامح خطيبها) .

(دينا وخطيبها يقدمان ثمرة رقص بديعة . . تصفيق وتهليل من
الحاضرين) .

(أحمد يرقص مع زوجته . . ولكن كل منهما يرقص وحده . .
وكانه بيوم فى عائله الخاص به) .

فؤاد : (للمذكور توفيق) إيه واحنا حانقعد كده نقاد والآ

إيه . . ماتيلآ . . بينا ترقص . . قوم يا أستاذ مطر .

الأستاذ مطر: لا ياسيدى أنا متعهد الحفلة .

(أحمد يذهب إلى التورته بعيداً فى آخر المائدة) .

(نعمت تنهالك جالسة إلى جوار فؤاد) .

(الاثنان يتحادثان فى همس) .

فؤاد : إيه مالك .

نعمت : تعبت
 فؤاد : مش زى عوايدك فيه حاجة مضايقاكى .
 نعمت : كل حاجة مضايقانى . حاسة إن كل شىء مش
 طبيعى . . تصور إني عاوزة أعيط (نظلى وجهها
 وتلثفت بعيداً) .
 فؤاد : (تمسك يدها فى رقة) .
 (أصوات ضحك فى كل مكان تفرق الحوار الخامس) .
 أحمد : (بصوت مرتفع من طرف المائدة) فى الهند وباء وفى اليابان
 زلازل وفى الصين أعاصير وفى اليمن جفاف والزرع
 ييموت م العطش . . وفى السودان سيول والزرع
 ييموت م الشرب . . وفى الصومال مجاعة والكل
 ييموت م الجوع . . واحنا هنا فى الأوده دى
 بنشرب عشر أنواع ميه غازية ومعدنية وكحولية . .
 وعشر أنواع جبن ولحم وفراخ وسمك وعشر أنواع
 جاتوه وتورته وسندوتش وتوست . . وناكل لقمة
 ونرمى عشرة .
 د. توفيق : ما تزعلش يا أحمد بك . . إحنا كمان حاشوت

بالتخمة زى الزرع ما ييموت م الشرب . . الحال
 من بعضه .
 أحمد : وفى أمريكا بيرموا القمح فى البحر عشان يرفعوا
 سعره .
 وفى العراق وإيران ييفجروا خزانات البترول موارد
 ثروتهم الوحيدة .
 وفى الشرق والغرب يبصرفوا المليارات على السلاح
 ويشتكوا م الفقر ده يبقى اسمه إيه .
 فؤاد : يبقى اسمه الجنون . . الرجاله مجانين .
 أحمد : والسنات أكثر . . مصانع الروح والكريمات والبذرة
 والمانيكير ميزانيتها أكبر من ميزانية جميع رحلات
 الفضاء .
 فؤاد : ما هم بيطلعونا فى الفضاء فعلا .
 مذكور : لمنطقة انعدام الوزن وحياتك (ضحك) .
 أحمد : أيوه . . انعدام الوزن وانعدام العقل . . وانعدام
 الأخلاق . . وانعدام الضمير . . إخوانى . . أنا أعلن
 أنى اليوم فى عيد ميلادى الخامس والأربعين رجل

مجنون . . أنا المقاول الناجح المليونير رجل مجنون
عاش في عالم مجنون منحط سافل . . وأنا كيان
رجل منحط سافل . . وانتو ناس سفلة . .
كلكم . . كلكم سفلة . . أوغاد . . مجرمين .

مذكور : إيه ده . . إيه ده .

د. توفيق : إيه ده يا أحمد بك . . إنت شربت وآلا إيه . .

إنت سكوت

أحمد : أنا فقط . . أنا صحيت . . فتحت .

توفيق : (هاساً لنعمت) دى أعراض تصلب شرايين . . أنا
قلت له ألف مرة ما ياكلش كثير .

فؤاد : (في سخريه) بعد ما كلت وشبعت بتقول الكلام
ده . . زى عوايدك يا أحمد دائماً بتفوق بعد فوات
الأوان .

أحمد : صحيح . . لكن أحسن من اللي ياكل ويشبع
وينام . . أحسن من اللي يسوق في الغلط
ولا يفوقش . . أحسن من اللي بينام وينوم كل
الناس . . ويتخدر ويتخدر كل الناس .

فؤاد : إيه إنت ناوى تخطب في الجامع اللي جنبنا وآلا إيه

أحمد : لا . . أنا ناوى أخطب في جامع نفسي الأول ،

ناوى أقف على منبر حياتي الخربانة وأزعتق في وداني

أنا . . وأندب نجاحي اللي كان عين الفضل

وصعودي اللي كان عين السقوط ، سيداتي

وسادتي . . أنا أعترف أني بهيم . . كنت دائماً

بهيم . . وانتم كيان كلكم بهيم . . مواشى . . بقر .

فؤاد : الله يكرمك .

أحمد : (بصرخ) إحنا مزرعة عجول نموذجية بقر فريزيان

لكن مايجبش لبن . . وإنما يجيب سم . . سم

زى اللي بيتعمل منه صناديق النستو الفاسدة .

رؤوف : إيه ياباني .

دينا : إيه ياباني مالك .

فؤاد : بابي يحب يحدد يادينا . . بابي دائماً أوريجينال في

كل حاجة .

نعمت : فعلا عيد ميلاد أوريجينال .

فؤاد : صحيح . . القعدة كانت حاتبقى ملة أوى . . أنت

عملت . Succé . برافو يا أحمد . . أنت راجل
جو .

مذكور : يا إخواننا عاوزين حد يسجل الكلام ده .
د. توفيق : دي حفلة تتداع على الهوا زي ما هي .
أحمد : (يتالك على كرسيد) عجيبة يا إخواننا . . الكلام الجذ
بيتي يضحك . . والكلام الهلس هو اللي الناس
بياخلوه جد ويعملوه دستور حياتهم . . بقول لكم
إيه . . تيجي نتكلم في الكورة . . تيجي نخمس . .
تيجي نلعب كارت . . تعرفوا يا جماعة أنا قررت
أدخل مستشفى المجاذيب بكرة . . يمكن ألقى هناك
حد يفهمني .

دينا : بابي إيه الكلام ده . . إنت بتخوفني .
أحمد : ما تخافيش يا بنتي يا حبيبتي . . الحكاية إني مش
حاقد أعيش بقية عمري بهم . .

دينا : أنت بتتكلم جد . .
أحمد : شوفا ازاي بنتي متصورة أني بهزر . . وكلكوا
بتصولي على أني بهزر .

دينا : يجد يجد ياباني (تبكي في حزن وإشفاق على أبيها)
أحمد : جانيت . . قوليلهم . . قوليلهم حاجة
جانيت : أقول لهم إيه .
أحمد : قوليلهم حاجة بالمزيكة يمكن يفهموا . .
ما عندكيش مزيكة تهز المخ بدل ما تهز الوسط
جانيت : الموسيقى اللي أنت طالها دي تعوز ألف عازف . .
تعوز أوركسترا .
أحمد : أبداً . . تعوز ودان . . وهم ما عندهمش ودان . .
إنما عندهم سنان .

(يستدير إليهم) إخواني المواشي . . إخواني اليهائم . .
إخواني البقر . . كلوا . . كلوا جتكو البلا . .
اطفحوا بالسّم الهاري في احتفال الخامس والأربعين
من حياة رجل فاشل سافل منحط . . وتصبحوا
على جنون وسفالة أكثر وأكثر .

(يخرج من قاعة الاستقبال والكل في حالة ذهول . . أفواه
فاغرة . . البعض يتسم . . والبعض يضحك . . والبعض يحبط
كفًا بكف) .
(تجري خلفه دينا ورؤوف وسامح والدكتور توفيق والجميع . .

لا يبق إلا فؤاد والزوجة نعمت في ركن وسط القاعة الواسعة
الغارقة في أنوار النجف الكريستال وروائح الطعام الشهية
والكراسي الفارغة . . وفي ركن بعيد جانب أمام الأورج تعرف
لحناً رقيقاً حزيناً .

نعمت : (هامة) شفت ازاي أنا عايشة لوحدي . . مع
إنسان مجنون .

فؤاد : (بضغط بدها) انتي عمرك ما كنتي لوحديك . . أنا
كنت دائماً جنبك يا نعمت .

نعمت : أبداً . . أمي . . وازاي . . كل حياتي معاك كانت
سرقة . . إنما بيتي . . بيتي كان دائماً وحدة
ونحراب . . وهو زي ما انت شايف . . طول
الوقت بيكلم نفسه . . لحظات الراحة الوحيدة هي
اللي كنت باعيشها سرقة بين أيديك . .

فؤاد : كل شيء له آخر .

نعمت : أنا مش فاهمة حكايته إيه .

فؤاد : دكتور توفيق يقول عنده تصلب شرايين .

نعمت : أبداً . . أنا رأيي أنه راجل سافل فعلاً . . بعد
ما ياخذ فلوس الناس ويحطها في جيبه ويصرفها

لآخر ملجم . . يصعبوا عليه . . ويقف يكلم نفسه
ويقول خطب . . كل يوم يقتل قتل الصبح
ويعشى في جنازته بالليل .

فؤاد : دكتور توفيق يشك في حالته وعمل له صورة على
المخ .

نعمت : مش المخ . . ده القلب . . ومش القلب كمان . .
دي النفس . . الغابة اللي جواه هي اللي عاوزه حد
يصورها . . بيخوفني . . عينيه بتخوفني . . نظراته
بتخوفني . . ساعات بيتيأ لي أن وراها جب مليون
وحوش . . ساعات بيتيأ لي أني عاوزه أقله
وارتاح .

فؤاد : إنتي قتلتيه من زمان يا نعمت . . إنتي جنتيه

نعمت : أنا اللي اتجنتت . . أنا اللي اتقتلت

فؤاد : هو يحبك مجنون .

نعمت : لما يقول لي يحبك - بحس أن معناها بكرهك . .

جسمي بيتشعر من الخوف وإيديا بتتلج لما بسمعه
يقول لي يحبك . . قلبي بيرتجف من الرعب لما بيلمسني

(تشبث به) ماتسبينش يا فؤاد . . أنا محتاجة لك . .

خليك جنبي . . أنا ماليش حب غيرك . . إنت

أقرب لي من النفس اللي في صدري . . لوسبتني

حاحس أن الروح سابنتي . . لو ختني حاحس أن

أيدي اليمين خانت أيدي الشمال .

- مستحيل يا نعمت . . انتي بتفكري ازاي

- أنا مش عاوزة أفكر . . لو فكرت حاتجنن زيه . .

- أيديكي بترتجف . .

- كلي بترتجف .

- كل شيء له آخر

- نفسي أرتاح . .

- بجهك .

(صوت أحمد يأتي عاليًا جهورياً من الداخل) .

- أنا بقول انتوا كلكوا كلاب . . كلكوا سفلة أوغاد

مجرمين . . أنا مش سكران . . أنا فايق . . انتوا

السكرانين . . أنا شايف كل شيء كويس . .

العالم اتغير . . مش ده العالم اللي اتولدت فيه . .

العالم بقي جبلاية قروود . . وكر تعابين .

نعمت : (في همس) وإنت واحد من اللي خلوا العالم وكر

تعابين .

(صوت أحمد بنفس النبرة الجهورية) .

- كهف عقارب . . مرعى للضباع والرمم .

نعمت : وإنت واحد من أكلة الرمم

فؤاد : كفاية يا نعمت . . مش معقول حانسيه كده . .

ده حاتجنن فعلاً .

(يقومان بجهان إلى الداخل) .

(ما زالت جانب تعزف نفس اللحن الحزين على الأورج) .

(كانت واقفة طول الوقت لا تتحرك كأنها تمثال) .

(صوت أحمد جهورياً من الداخل) .

- سيونى كلكم . . نفسي أقعد لوحدي . . نفسي

أهرب منكم . . ومن نفسي . . أنا تعبت . . مش

عاوز حد يبجي ورايا . .

(تحفت الأضواء قليلاً قليلاً . . ظلام) .

(نفس المشهد من جديد . . يبدو غارقاً في ضوء أخضر . . وفي

جانب تقف جانب في ضوء أحمر متوهج كوردة . . ما زالت

تعرف نفس اللحن الخزين .

(يدخل أحمد مترنحاً) .

(يتجه إلى جانبتي في عاطفة) .

(تتحرك جانبتي تجاهه) .

(لأول مرة نكشف من حركتها ونظرها أنها عمياء ضريرة)

(تنحس الطريق إلى يديه) .

أحمد : جانبتي . . نفسي ألقى مكان أهرب فيه من نفسي .

جانبتي : (تعثر على يديه) تعالى هنا يا أحمد . . اهرب جوايا . .

أحمد : ده مش مهرب . . ده مسكن . . ده انتي نفسي

أنا . . انتي أنا . .

ده إحنا الاتنين محتاجين لمهرب . .

جانبتي : ليه ياربي دائماً بنختار الاختيار الخطأ كل مرة .

أحمد : بنختار اللي بيتها لنا أنهم الميه والفضل والراحة . .

لكن الظاهر أن مقيش بقعة ضل في الدنيا . .

والحياة كلها صحرا بتضرها كراييج الشمس .

جانبتي : وكل واحد فينا كراياج للثاني .

أحمد : هي كرايجي . . وأنا كرايجها . . وهو كرايجنا .

جانبتي :

حاول تنسى الموضوع ده يا أحمد .

أحمد :

فؤاد نافسي في السوق وهزمته وكسرتة . . قام دخل

على من الشباك وكسرتني في بيتي . . كل ما أخذ منه

مناقصة أو عطا . . ياخذ مراتي مني ليلة (يضحك

ضحكة خافتة مريرة) احنا بنتسابق على إيه . .

وبنتحارب على إيه . . الدنيا كلها كذبة . . وهم

سراب . .

مقيش مكسب في الدنيا يستحق ان الواحد يحس

نفسه .

جانبتي :

غمض عينك يا أحمد . . غمض عينك . . حاول

تنسى . . حاول تعيش في عالم زى العالم اللي أنا

بعيش فيه . . عالم مقيش فيه عيون ولا وجوه

ولا ملامح . . ليل طويل . . مريح (تاخذ رأسه على

صدرها في حنان) .

أحمد :

الليل بالنسبة لي كواييس بسمع فيها هسهسة الأفاعي

وفحيح التعابين . . الليل هو الشك والجنون

والندم . . الليل هو الحشرات والأحقاد

والخاوف . . الليل اعتقال وسجن ومحكمة . .
جانيت : ماتعذبش نفسك يا أحمد . . كفاية اللي انت
فيه . . كفاية اللي بيعملوه فيك . . ما تخلقش من
عقلك جهاز تعذيب . . ما تجعلش من ضميرك
جلادك . . ارحم نفسك . .
أحمد : المشكلة أكبر م اللي بيعملوه . . وأكبر م اللي
يعمله . .
المشكلة بقى أكبر مني ومنهم . .
جانيت : (تضمه بذراعها في حنان) المشكلة هي أنت . .
أحمد : يا ريت . .
جانيت : مالك يا أحمد . . جسمك كله بيرتجف . .
أحمد : انتهى كل شيء يا جانيت . . الصورة اللي عملتها
على الدماغ من يومين كشفت عن ورم في المخ . .
خلاص . . كل اللي باقى م العمر أيام أو شهور . .
جانيت : (مفروعة) يا ربي . . مش معقول . . مش معقول . .
مش معقول (تضع رأسه على صدرها . . وتغمغم في نبرة
باكية) . .

(يا حبيبي . . يا حبيبي . . يا حبيبي) . .
(تحفت الأنوار . . فلام . . يتغير المشهد) . .
(غرفة الصالون الأنيقة في بيت أحمد الشهاوى . . الزمان تبار . .
الشمس تدخل من إحدى النوافذ النور يغمر الغرفة . .
الزوجة نعمت . . المستشار القانونى الأستاذ مطر . . الدكتور
توفيق . . الثلاثة جلوس يتململون في قلق وتوتر . . فؤاد يذرع
الغرفة في عصبية . . يقعد ثم يعود فيهب واقفًا) . .
مطر : (لنعمت) أحمد أخباره إيه . .
نعمت : نقلناه امبارح مستشفى المعادى . .
مطر : وازى حالته دلوقت . .
نعمت : الدكتور بيقول خطيرة . .
(كلهم ينظرون إني الدكتور توفيق)
توفيق : الحالة خطيرة فعلاً . . ويصحى شوية وبعدين
يروح في غيبوبة . . وعنده شلل خفيف في الذراع
اليمنى والرجل اليمين . .
مطر : مش ممكن إنقاذه بعملية جراحية . .
توفيق : فيه جراح في فرنسا ممكن يعمل الجراحة دى . .
لكن المجازفة حاتكون كبيرة . . حاجتاج الأمر

استئصال جزء كبير من المخ . . ولو نجحت الجراحة
حايبق بعدها واحد تانى . . جايز يرجع طفل . .
وجايز يفقد الذاكرة . . وجايز يفقد شخصيته تمامًا.

مطر : وهو رأيه إيه .

د. توفيق : هو رافض أى تدخل جراحى ويعتبر المسألة

انتهت . . ومش عاوز حد يزوره أو يجش عليه . .

ويقول سيونى وحدى مع ربنا أكلمه ويكلمنى . .

أنا عمري ما اتعرفت عليه . . وعمري ما ركعت له

ولا صليت له . . ولا استسمحته . . دى فرصتى

الوحيدة فى أنى أحبه ومحبنى . . وأرضى بحكمه

وبرضى بعمونى .

نعمت : وعمل إيه يا أستاذ مطر لما رحلت له النهاردة عشان

الوصية .

مطر : رفض يقابلنى وقال اللى عندكو كلوه .

نعمت : وبعدين .

مطر : المشكلة أنى اكتشفت أن الشريك مزيف كل

الدفاتر ومزيف كل الحسابات ولو ما حصلش

تدخل نيابى وقضائى فى حياة أحمد حاتطلع ثروته

مدينة والضرائب حاتاكلها وحاتطلعوا كلكو ملط

فؤاد : (فى نوتر) والعمل إيه .

مطر : لا بد من تحقيق فورى وكتابة محضراتهم موقع عليه

من أحمد قبل ما يفوت الأوان . . لا بد من شهادته

قدام القاضى .

نعمت : وانت مستنى إيه .

مطر : رافض يقابلنى ورافض يقابل أى حد . . وحالته

تعبانة وماتسمحش بأى مساءلة . . وكل شوية

تدهور أكثر .

توفيق : بعد ساعات الموقف حايقلت من أيدينا نهائى .

فؤاد : والعمل إيه .

نعمت : لازم نعمل حاجة .

فؤاد : دينا ورؤوف لازم يروحوا له . . دول أولاده ومش

معقول حايرفض يقابلهم . . لازم يروحوا ويخطوا

قدامه الموقف كله .

نعمت : ما افتكرش حايقدروا يعملوا حاجة .

فؤاد : يبقى مفيش فاضل إلا حل واحد .

نعمت : إيه .

فؤاد : إنه يتشال غصب عنه في الطيارة لباريس وتعمل له العملية .

نعمت : إزاي حايتشال بدون إرادته .

فؤاد : لأنه في الوضع الحالي مالوش إرادة . . لأنه معندوش المخ اللي يكون بيه رأى سليم . إيه رأيك

يا دكتور . .

توفيق : فعلاً هو دلوقت ما عندوش الحاجة اللي اسمها إرادة

حرة ولا المخ اللي يكون بيه رأى سليم . . لكن هل

انتو متأكدين أنه حايرجع بعد العملية زى

ما كان . . متأكدين إنه حايرجع أحمد الشهاوى

المقاول الناجح العبرى . . المستقبل كله علامة

استفهام . ممكن يرجع صديق . . وممكن يرجع عدو

ممكن يرجع راشد زى ما كان وممكن يرجع

طفل . . ممكن يفقد الذاكرة . . وممكن يفقد

النطق وممكن يبقى الحصول على شهادة منه أمر

مستحيل . . ويمكن يرجع مشلول ويقضى بقية

عمره على كرسي أو طريح فراش عالة على نفسه

وعليكم . . ويمكن ما يرجعش خالص .

نعمت : على أى حال فيه واحد في الألف أمل . . إنما

لوسبنا الموضوع بيتي ضعنا كلنا .

توفيق : إيه رأيك يا فؤاد .

فؤاد : أنا مش عارف أقول إيه . . ومش قادر أختار .

توفيق : إيه رأيك يا أستاذ مطر .

مطر : الحقيقة الموقف دقيق جداً . . وجميع البدائل اللي

قدامنا خطيرة . . ومن حق المريض برغم كل شىء

إنه يبقى له رأى لأن هو اللي حايرجع مشلول وهو

الى حايرجع بعاهة . . ما حدش فينا حايجازف

بشىء . . إحنا كلنا دلوقت بنجازف بواحد تانى . .

كلنا بنختار وواحد غيرنا حاي دفع ثمن الاختيار شلل

وعمى وموت وفقد للذاكرة وفقد للمستقبل .

نعمت : أبداً . . مش صحيح . . إحنا لو سكتنا حانجازف

بكل شىء . . الضرايب حانحجز على البيت

والأرض والأسهم والسندات والشريك حايأخذ
كل شيء بالنصب والتزوير وحانظلع كلنا
شحاتين . . فيه مجازفة أشنع من كده .

فؤاد : فعلاً . . شيء فظيع . . فظيع .

مطر : إنتي حاتجازفي بفلوسك . . هو حايجازف برقبته . .
فرق كبير .

نعمت : أبداً نفس الشيء . . فلوسى هي حياتى هي قيمتى
هي بيتى هي ضيوفى هي جمالى هي رقبتى هي كل
شيء . . لو بقيت شحاته كل شيء حايتهغير حتى
شكلى في عيون الناس إنت مش عارف الدنيا
شكلها إيه . . ولا الناس شكلهم إيه . . إحنا
ف غابة .

فؤاد : صحيح . . لا بد من عمل . . لا بد من اختيار .

نعمت : وعدم الاختيار هو أسوأ اختيار . . والسكوت حكم
أسوأ من كل حكم مش ممكن تقعد ساكتين كده .

توفيق : (يضع رأسه بين كفيه) أنا مش قادر أفكر .

(تحفت الأنوار . . ظلام . . يتغير المشهد) .

(غرفة مستشفى ليل) .

(أحمد راقداً على سرير) .

(جانبى إلى جواره) .

(مقطوعة اللحن الحزين في الخلفية) .

(أحمد بين نوم ويقظة . . يفتح عينيه) .

أحمد : جانبى . . الدنيا بتضلم في عينيه . . أنا مش

شايف . . أنا بقيت زيك مش شايف . . تعالى . .

قرنى منى . . تعالى . . فبن إيدك . . فعلاً الضلعة

مرحبة . . مافيهاش عيون ولا وجوه ولا ملامح

مففيهاش أى شيء غير لمسة إيديكى . . الله . . لمسة

إيديكى حلوة . . فيها الحنان والصدقة والأخوة

والوفاء إلى عمري ما عرفته . . لكن الدكتور يقول

لى إنى ممكن أفقد اللمس كمان . . وأفقد الحركة

وأفقد السمع . . بيدينى مورفين دائماً . . كتر

خيره . . مش حا احس بحاجة . . حاموت عضو

عضو في سكون .

أنا صليت امبارح وقلت لربنا أنا بحبك وراضى

بحكمك يا رب . . وابتهلت له أنه يحبنى ويرضى

بعيوني . . وحسيت بعد الصلاة أن نفسي شفت
أوى أوى . . وأنى اتولدت من جديد .

جانيت : (تضمه وتقبله) حبيبي حبيبي . . ما تقولش كده إنت
حاتحف وحاتعيش .

أحمد : أنا مش عاوز أعيش . . مش عاوز افتح عينيه تانى
وأشوف الكذب والنفاق . . شبعتمثيل فى الحفلة
التنكرية الكبيرة اللى اسمها الدنيا . . انتهى
الكرنفال وقلعت القناع . . مش عاوز حد يرجعنى
تانى .

جانيت : خدلى معاك طيب .

أحمد : إنتى معايا دائماً يا جانيت .

جانيت : مش حاقدر أعيش لحظة بعدك يا أحمد .

(طرفة خفيفة على الباب) .

(يدخل الدكتور توفيق) .

(يجيل على أذن أحمد) .

توفيق : دينا ورؤوف ع الباب بيعيطوا وعاوزين يشوفوك .

أحمد : دخلهم .

(تخرج جانيت والدكتور) .

(تدخل دينا ورؤوف) .

(دينا تلقى بنفسها فى حضن أبيها وتبكي فى حرقه) :

دينا : بابى . . بابى . . مالك .

أحمد : (بتحسس وجهها) . . أنا مش شايفك . . قولى خذك

منى . عشان أبوسك (يقبلها) .

دينا : بابى . . بابى . . (تبكي) بعد الشر عليك ألف

سلامة لك .

رؤوف : (يجلس إلى جوار أبيه . . يحتضنه) سلامتك يا بابا . .

سلامتك . . إن شاء الله حاتحف وحاترجع

لصحتك . . إن شاء الله شدة وتروى .

أحمد : ما تعيطوش . . ده حال الدنيا . . كل شىء لازم

ينتهى . . ماجراش حاجة . . كل اللى حصل أن

انتهى التياترو اللى اسمه بابى أحمد . . شطب

السيرك . . ويلموا الخيام ويشيلوا الأوتاد . .

وحاتعزل لبلد تانية . . لعالم تانى .

دينا : لا يمكن يا بابى تسيينا كده .

لا يمكن تمشى وتسينا . . إنت عارف أبيه مذكور
عمل فينا ايه . . عارف عمل في الحسابات والدفاتر
ايه . . ده خد كل حاجة وزور كل حاجة
والضرايب حانحجز ع البيت والأرض والبنك
وحانرجع فقرا .

يمكن لو ابتدئوا فقرا يبقى أحسن من الفلوس
الحرام . . ما هو كله في الآخر ضايح زى ما انتوا
شايقين ياولاد . . الحسبة في الآخر بتفلس بشريك
حرامى أو شريك أمين . . الكل بيفلس . . جسم
القضية بيفلس . . لاسمع ولا بصر ولا حس
ولا خبر . . جسم القضية يبقى تراب . . يبقى تبكوا
على ايه .

إذا كان الواحد في الآخر بيصحى ما يلاقيش إيده
ولا رجليه ولا عينه ولا وده . . وفي الآخر
ما يلاقيش نفسه . . يبقى حانزعل يوم ما يصحى
ما يلاقيش حسابه أو دفاتره . . ايه دى جنب
دى . . وتعرفوا مدين أن الغنى أصلح لكو

م الفقر . . يمكن لو سألتنى دلوقت حاقولك
لو ابتديت فقير يمكن كان الفقر ربانى تربية أحسن .
إنت بتقول كده يا بابا لأنك عيان . . ولو كنت
بصحتك كنت قلت كلام تانى . . وكنت رفعت
قضايا وقومت محامين وما جالكش نوم إلا لما سلمت
أبيه مذكور للنيابة وحطيته في الحديد .

فعلاً لك حق يا بنى . . فعلاً . . أنا بقيت إنسان
تانى مريض . . وجايز رأيى بقى هو كيان رأى مريض
زى . . جايز رأيى بقى أعمى زى عيني فعلاً . .
لكن أنا معذور . . أنا مش قادر أشوف بعينك
ولا أسمع بودنك . . مش قادر أكون أى حد غير
نفسى . . مش قادر أكذب على نفسى وأجاملك
وأنا عارف أنها آخر كلمة حاقولها ويمكن آخر نفس
وآخر دقة قلب . . أنا القضية وأنا الموضوع . .
ومش ممكن حاقدر أخرج عن الموضوع .

أنا مش فاهم حاجة يا بابا . . أنا مش فاهم حاجة .
كل اللي حاسس بيه إن إحنا ضعننا (بختضنه ويكى)

ضعنا .

أحمد : (في استلام) اللي تشوفوه صالح اعملوه . . أنا راضي
بأى قرار يريحكوا . . انتو أولادى وأنا أبوكو إحنا
شركة ومش حاقدنر آخذ قرار لوحدى (يضع يده على
رأسه ويتأوه في ألم) آه .

دينا : مالك يا بابى .

أحمد : داىخ . . داىخ أوى . . دخت فجأة (يتلغم)
مش . . قا . . د . . ر . . ات . . كلم . . (يدخل في
الغيوبة من جديد) .

دينا : (تصرخ) بابى . . بابى . . يا دكتور توفيق . . دكتور
توفيق .

(تجرى على الباب وهي تصرخ) .

(تعود بسرعة ومعها الدكتور توفيق) .

(الدكتور يكشف عن صدره الثياب ويختبر القلب بالسماعة . . ثم
يختبر ردود الفعل في مفصل الركبة والقدم . . ينظر إلى حدقة
العين . . يخرج بطارية صغيرة من جيبه ويطلق شعاعاً على حدقة
العين)

(يوصل الأقطاب الكهربائية إلى جهاز رسم القلب) .

(يوصل الأقطاب الكهربائية إلى جهاز رسم المخ) .

(بلاحظ الأجهزة اللي جوار الفراش . . يضبط أزرارها ويتابع
شاشاتها) (الشاشات التلفزيونية للقلب والمخ تعمل بنظام)

د. توفيق : الحمد لله القلب طبيعى والمخ بيشتغل .

ما تخافوش دى مجرد دوخة مؤقتة جت له قبل كده
وراحت .

الورم بيضغط على أجزاء حيوية من المخ . . وفيه
احتقان في المراكز العصبية ده كل الموضوع . . لكن
إن شاء الله حاتكون إغماءة مؤقتة زى كل مرة
ما تخافوش . . سليمة إن شاء الله .

(لرؤوف) اضرب تليفون لماما والأستاذ مطر بيجوا
حالاً .

رؤوف : حاضر يا دكتور .

(يسرع إلى التليفون في ركن الغرفة . . يدير القرص . . مرة بعد
أخرى) .

(الرجوه القلقة المتوترة والعيون الزالفة تنحني على المريض الراقد في
الغيوبة) .

(تخفت الأنوار تدريجياً . . ظلام . .) .

(نفس المشهد مع وجود نعمت وفؤاد والأستاذ مطر والدكتور توفيق .. أحمد في غيبوبة لا يتحرك ولا يدري من أمر نفسه شيئاً الحضور يتداولون على مصيره).

(نوتر على كل الوجوه .. البعض بدخن .. البعض يلزع الغرفة في عصبية).

توفيق : الوقت يبجري .. وكل لحظة معناها مصير.

نعمت : مصيرنا ومصيره .. الرحمة يارب ..

توفيق : قتلوا إيه .

مطر : قرروا من غيري .. أنا مش موجود .. أنا

ما اقدرش أحتمل نتيجة قرار خطأ .. ما اقدرش أحكم على إنسان بالبؤس والشلل وأشوفه بيتعذب قدامي وأشعر أني كنت السبب .

فؤاد : سكوتك مش حايعفيك م المسئولية .. سكوتك حايقته .

صمتك حايبقي جلاذ أخرس حايقضي عليه .

مطر : صمتي مش حايموته ولا كلامك حايجيبه .. الموت والحياة بيد الله .

توفيق : ربنا ادانا عقل وسلمنا الأمانة وجعلنا مسئولين .

مطر : أنا أحكم في اللي أفهمه .. إنما اللي ما افهموش أسلم فيه .

نعمت : إنت حاتسلم رقبتنا ورقبته .

مطر : أنا ما اعرفش .. أنا مش هنا .

نعمت : أنا أعرف .. مفيش قدامنا اختيار .. لازم ناخده

فوراً ع الطيارة لباريس .. مفيش حل تاني .. إيه رأيك يا دكتور .

توفيق : أنا كلمت الجراح وبعث برقية للمستشفى في باريس تحسباً للظروف .

نعمت : ومستنيين إيه .. مالك ساكت يا فؤاد ؟

فؤاد : مافضلش كلام يتقال .

(نحفت الأنوار تدريجياً .. ظلام ..)

الفصل الثاني

المشهد - ليل

(نفس غرفة الصالون في بيت أحمد الشهازي ولكنها تغيرت كثيراً .. قطع الأثاث السيل الفاخرة اختفت وكذلك النجف الكريستال والنحف الغالية في الأركان والزهرات الجميلة والسجاجيد الشنوا .. اختفى كل هذا الترف وحل محله طقم عادي قديم ..

نعمت جالسة وقد دفنت وجهها في يديها
يدخل الأستاذ مطر ..

لا تشعر بخطواته .. مازالت تدفن رأسها ..
وكأنما لا تريد أن تفتح عينيها أبداً .

يقف أمامها صامتاً .. في يده مطروف
يجلس على الكرسي بجوارها .

يطول الصمت .. ثم نراه يهمس
- مدام نعمت .

ترفع رأسها وتتلفت كأنما هي قادمة من عالم آخر
ملاحظتها بدت عليها الكبر وشعرها تسلس إليه الشيب مع أنه لم يمض
وقت طويل على أحداث الفصل الأول .

نعمت : فؤاد اختفى مش بالاقية . . وبأسأل عليه في التليفون
 بينكر نفسه . . فؤاد اللي كان أكثر من صديق وأكثر
 من أخ . . فؤاد اللي كان كل حاجة . . سامح
 خطيب بنتي اختفى . . داليا خطيبة رؤوف
 اختفت . . فجأة اتلفتنا لقينا روحنا لوحدنا والبيت
 بقى ع الحيطان . . فجأة حسيت أن سني كبر ميت
 ستة وخطوتي بقت ثقيله وضهرى انحنى كأنى شايله
 جبال . . فطيعة الدنيا . . فطيعة .
 مطر : مدام نعمت . . اللي يعيش النهار لازم يعيش
 الليل . . احنا على أرض بتدور .
 نعمت : ولايمتى حايطول الليل . . أنا تعبت .
 مطر : مدام نعمت .
 نعمت : مش قادرة . . مش قادرة . .
 (تعود فتحق رأسها في كفيها . ترفع رأسها وتنظر في شراسته) .
 نعمت : والمجرم اللي اختلس كل شىء وزور كل شىء وخذ
 الفلوس وراح باريس يصرفها ع الكباريهات
 والقمار . . شريك الشيطان اللي خد حياتنا وهرب

الأستاذ مطر : مدام نعمت .
 نعمت : أبوه .
 مطر : إزيك دلوقت .
 نعمت : الحمد لله .
 مطر : أنا جيت لك المبلغ اللي جمعناه من مبيعات المزاد
 امبارح . . خمسة آلاف جنيه ومية واتناشر .
 نعمت : بس . . كل العفش ماجابش غير كده ؟!
 مطر : أول عن آخر .
 نعمت : وبعدين .
 مطر : اتصرفي فيهم بعقل لغاية مارينا يفرجها .
 نعمت : حايفرجها منين . . الضرايب حجزت على البنك
 والعمارة والأرض والحزنة . . والحساب الختامي
 للشركة طلع مدين . . والذهب اللي عندي بعته . .
 والعفش بعته .
 مطر : فؤاد مش قال حايجيب لك مبلغ .

بيها . . . مفيش قانون يحاسبه . . . مفيش بوليس

يعتقله . . . مفيش حكومة تسجنه .

مطر : وحانطلب اعتقاله ازاي ومفيش أدلة ولا أوراق

ولا شهود . . . وصاحب الحق ما عايش داري

بنفسه ولا بينا .

نعمت : (نكلم روحها) واللى قتلنى وهرب . . . الغادر الجبان .

مطر : مين ده . . . يا مدام .

نعمت : أبداً . . . برده مفيش أدلة ولا أوراق ولا شهود . . .

جريمة قتل بدون دم . . . بدون بصمات .

مطر : ربنا موجود يا مدام .

نعمت : يا ترى ربنا معانا وإلا علينا يا على أفندى .

مطر : ربنا مع الحق يا مدام .

نعمت : كل واحد متبياً له أنه على الحق . الحق بقى نسخ

كثيرة أوى بعدد الناس .

مطر : الحق واحد مفيش غيره يا مدام .

نعمت : إنت مؤمن يا على أفندى .

مطر : ونعم بالله يا هانم .

نعمت :

طيب ليه الدنيا فوضى . . . ليه كلها عذاب .

مطر :

هى فوضى بسببنا إحنا . . . تصرفنا لدنيانا هو اللى

سبب كل الفوضى والعذاب . . . ربنا بيحب

الكل . . . لكن الإنسان هو اللى عدو نفسه . . .

نعمت :

وليه الإنسان عدو نفسه . . . ليه .

مطر :

ده سؤال كل واحد يسأله لروحه يا مدام . . . ده

سؤال عليه أربعة آلاف مليون جواب بعدد سكان

العالم .

نعمت :

كل يوم يسأله لنفسى ألف مرة . . . كل ساعة . . . كل

دقيقة . . . كل لحظة . . . لما دماغى انفجرت . . . مش

لاقيه جواب .

مطر :

العمر كله جواب . . . أفعالنا كل لحظة جواب .

نعمت :

يعنى ايه . . . قصدك ايه . . . بتهمنى يا على .

مطر :

أنا مش باتهمك يا هانم .

نعمت :

أنا عارفه . . . كل الناس بتهمنى . . . كل العيون

بتهمنى . . . كل واحد بيشتمنى من ورا ظهري . . .

حتى الساكت سكوته بيهمنى . . . كل واحد بيقول

نعمت هي التي عملت فيه كل ده . . نعمت هي
التي قضت عليه . . نعمت هي التي خربت
حياته . . نعمت هي التي هدمت مستقبله . .
مفيش حد بيسأل نفسه . . وهو . . هو عمل في
نعمت إيه .

يمكن أنا اتجشنت صحيح . . لكن هو اللي جننى . .
هو اللي جننى .

مطر : ده كلام مالوش لازمه دلوقت يا مدام . .
ماعادش ينفع . . ماتعديش روحك . . اللي
حصل حصل . . وسهم ربنا نفذ . . مافصلش لنا
إلا أننا نقبل الحكم .

نعمت : مش قادرة يا على . . مش قادرة . . الزلزال اللي
حصل أكبر من عقلى . . أكبر من قدرتى . .
الحوادث سبقتنى .

الليل هجيم على فى عز الضهر .

والشيخوخة دفتنى فى عز الشباب .

(تتكوم فى كرسيا وتدفن رأسها فى كفيها من جديد وتنخرط فى

البكاء) .

(يظول الصمت) .

(لا يجد الأستاذ مطر ما يقوله . . يضع طرف الأوراق المالية أمامها
على الطقوفة . . ثم ينصرف فى هدوء) .
(ترفع نعمت عينها . . تتلفت حوفا فى نظرات كليلة) .

نعمت : (هامة لنفسها فى دهشة) مش معقول . . مش قادرة

أصدق (تهب من جلوسها . . تنجول فى الغرفة بعينها) . .

ده بيت أحمد بك الشهاوى . . ده صالون

نعمت . . ؟!! التليفون ساكت زى الموميا . .

اللي كان بيرن كل خمس دقائق اللي كان بيكلمنى

كل شوية زى المجنون . . ويقوللى واحشانى بحبك

حاموت عليكى . . بقالى خمس دقائق

ماشفتكيش . . دلوقت أطلبه ألقبه شايل

الساعة . . فؤاد . . اللي حبيته حب العباداة

وضيعت فيه حياتى وعمرى دلوقت بينكر نفسه

وينكرنى . . أجيب منين العقل . . ماعادش فيه

معنى لأى شىء . . كل شىء بقى ضلمه . . كل

حياتى بقت ضلمه . . بقت خراب .

انفض السامر وماتت الضحكات . . وانطوى كل
شيء كأنه وهم . . كأنه خيال كأنه حلم .

وأنا بقيت مش أنا . . وهو مش هو . . وهم مش
هم .

فين الحقيقة من ده كله (تجول في الغرفة كأنها نمشي في
نومها) . . أنا مين أنا نعمت اللي كانت . . والآ

نعمت اللي بقت . وهو مين . . هو فؤاد القاسي
الغادر اللامبالي . . والآ فؤاد العاشق الحنون . .

كان كذب كل اللي كنا فيه . . كان تمثيل .

مش معقول .

مش قادرة أصدق (تسمر في مكانها واقفة) .

مش قادرة أصدق .

لأه . .

مش ممكن .

لازم قطعوا لي حته من مخي زي ما عملوا لأحمد .

لازم خدروني وخدوني لباريس وعملوا لي جراحة

غصب عني . . ورجعت واحدة ثانية .

نعمت : (تصرخ . .) توفيق . . دكتور توفيق . . دكتور
توفيق .

(يشغل دكتور توفيق مسرعاً)

توفيق : ايه مالك يا نعمت .

نعمت : الحقني . . أرجوك كلمني بصراحة . . أرجوك

ماتكدبش عليه . . (في عصبية) احلف لي . . مين

اللي خدته بباريس وعملتوا له العملية . . (تصرخ)

هو وآ أنا .

توفيق : ايه يا نعمت . . انتي جري لعقلك حاجة مش إحنا

مسافرين سوا . . وانتي واخده سرير مرافق في

المستشفى . . وانتي اللي مدخلاه أودة العمليات

بايدك .

نعمت : (تتلفت خوفاً بعينين زائغتين) أنا اللي دخلته أودة

العمليات صحيح . . لكن بعد كده حصل ايه . .

مين اللي أدوله الحقنة المخدرة ومددوه على تربيذة

العمليات . . ومين اللي (ينظر إليها كالمشدوه) تهزه في

عنف، انطق . . قوللي ع الحقيقة .

توفيق : جرى إيه يا نعمت .. مش معقول الأمور حانتقلب
في دماغك للدرجة دي .

نعمت : ومش معقول كيان الدنيا كلها تتغير في لحظات وأنا
أبقى مش أنا والدنيا تبقى غير الدنيا .. مش قادرة
أصدق .. مش قادرة أصدق عينيه يا توفيق .. أنا
حاجتجن .. حاجتجن .. (تتألم باكية) مش قادرة
أتحمل .. بقالي أيام وداني بتشحت كلمة ..
بتشحت سؤال .. بتشحت همسة .. مش معقول
تمت العشرة وتنهى المودة ويتغير الناس .

مش معقول كل ده يحصل مرة واحدة .. في
غمضة عين .. العالم يبقى غير العالم والدنيا تبقى غير
الدنيا والبيت غير البيت .. وأنا اللي كنت الغندورة
الحبوبة اللي بيحجرى وراها كل الناس ويقصدها كل
الناس .. أبقى الإنسانية المكروهة اللي بيهرب
منها كل الناس وينكرها كل الناس .

توفيق : بتستغري ليه .. مش هو ده رأيك .. مش إنتي
إلى قلتي .. ما اقدرشى أجازف بفلوسى .. فلوسى

هي قيمتى .. فلوسى هي جمالى .. مش ده
كلامك .

نعمت : فعلاً .. كنت بقول كده .

توفيق : وراحت فلوسك وراح معها جمالك
وقيمتك .. وانفض الناس .. مستغربة ليه .

نعمت : لأنه كان كلام .. والكلام سهل .. إحنا بنغنى
أغاني المهجر كل يوم .. لكن إالى عاش المهجر يعرف
إنه شىء تانى .. فرق كبير بين كلمة الفقر وطعم
الفقر .. بين سيرة الغدر وطعم الغدر .. إحنا كنا
بتكلم يا توفيق .. كان كلام .. كانت حياتنا كلها
كلام .

توفيق : صحيح .. كانت حياتنا كلها كلام .

نعمت : وحبنا كلام .. وأخلاقنا كلام .. وأشواقنا كلام .
ياما نفسى أرجع لوراً وأعيش الماضى من تانى ..
أعيشه بجد .. أعيشه بصدق .

توفيق : كنتى حاتملى إيه .

نعمت : كنت حابقي واحدة تانية يا توفيق .

توفيق : ما أظنش .
 نعمت : كنت حانكره قبل ما ينكرني . . كنت حاطرده
 واحتقره . . كنت حادوسه زي الحشرة .
 توفيق : ما أظنش .
 نعمت : ليه بتقول كده .
 توفيق : لأن الوعي ده ما جالكيش إلا دلوقتي . . لما عشت
 الفقر وتعزيتي من كل شيء . . ولورجعتي نعمت
 المليونيرة . . حانزل على عنيكى حجاب الغنى من
 جديد . . وحاترجعي نعمت الغندورة المغرورة بنت
 الهوى .
 نعمت : أنا اتعلمت .
 توفيق : ما افتكرش . . انتى افتقرتى بس . . لكن
 ما اتعلمتيش .
 نعمت : إنت بقيت قاسى زيهم كلهم .
 توفيق : مش عاوزك تتخدعى فى روحك تانى . . كفاية
 مرة .
 نعمت : أنا ما اتخدعتش فى روحى . . أنا اتخدعت فيكم

وفيه .
 توفيق : كلنا اتخدعنا ف بعض واتخدعنا فى روحنا . . الجو
 كله كان جو الغرور واللهو وتقضية الوقت . . كلنا
 كنا بتلعب .
 نعمت : والحرقه اللى فى قلبى دى كلها لعب .
 توفيق : أبوه حرقه اللى خسر اللعب .
 نعمت : لا أبداً . . حرقه إلى صحى على الغش .
 توفيق : غش مين لمن . . هو كان بيغشك . . وإنتى كنتى
 بتغشى جوزك . . وجوزك كان بيغش الناس . .
 وشريكه كان بيغشه . . كل واحد كان يسرق من
 جيب التانى . . مش إحنا إلى نتكلم عن الغش
 يا مدام نعمت . .
 نعمت : ما دام الكل حرامية . . ليه أنا وحدى أدفع الثمن .
 توفيق : الكل حايدفع . . إلى هرب النهاردة حايقع
 بكره . . كل واحد له يومه . . وإلى حاهرب من
 حساب الدنيا حايقع فى حساب الآخرة .
 نعمت : هو فيه آخرة كمان بعد كل ده .

توفيق : إلى إحناء فيه دلوقت إنذار بالآخرة . . إلى إنتى فيه
يوم قيامة صغير .
نعمت : إنت حاتخوفنى . مش كفاية إلى شفته .
توفيق : ياريتك تخافى . . إلى بيخاف بيسلم . . لو خفتى
ما كنتيش عملتى إلى عملتيه ولو هو خاف ما كانش
عمل إلى عمله . . ولو إلى سرق خاف ما كانش
عمره سرق .
نعمت : إنت بتخاف يا دكتور توفيق .
توفيق : صدقيني يا مدام . . أنا لما يشوف وشه دلوقت يتلج
من الرعب . . أحمد بيه الشهاوى صاحب الحيلة
والحرقة والدهاء وصاحب المال العريض وصاحب
الاسم إلى زى الطبل . . أشوفه دلوقتي بيعمل
كابنيه على نفسه . راح فى النجاح والمجد . . راحت
فىن العبقرية . . راح فىن الغنى . . إيه الضمان بعد
كده لبقاء أى شىء .
منين أجيب الشجاعة بعد كده عشان أعش
أوأخون أوأسرق .

نعمت : أنا باحسدك .
توفيق : ليه .
نعمت : (فى غل) عشان أنا عاوزه أقتل . . عاوزه أنتقم . .
عاوزه أدمر . . جوايا نار قايدة . . جوايا نار . .
عاوزه أطفى النار وأشقى الغليل .
توفيق : النار لا يمكن حاتطفىها النار .
نعمت : مش قادرة أنساه . . مش قادرة .
توفيق : النار حاتا كل فى حطبك وحاشتعل أكثر .
نعمت : غدره وخيانتة جتنونى . . جرعونى الهوان .
توفيق : ده مش حب له ده حب لنفسك ، إنتى دلوقتي
غضبانة لنفسك مش عليه . . إنتى عمرك ما حبتيه
ولا حبيتى حد . . إنتى حبيتى نفسك وسلطانك على
الرجال .
نعمت : نفسى ألاق تريباق للهوان .
توفيق : ملايين الأرض مش حاتحل لك مشاكلك . . إنتى
عذابك جواكى .
نعمت : أنا أخذت أكبر درس .

توفيق : وما انتفعتيش بأى درس . . إنتى لسه بتطلعى من
أناية لأناية . . ومن غرور لغرور . . ومن شهوة
أكالة لحقد أكال . . إنتى لسه فى مكانك . .
محللك سر .

نعمت : نفسى ألاقى تريباق للهوان .

توفيق : إنتى نفسك الداء .

نعمت : نفسى ألاقى تريباق للهوان .

توفيق : إنتى مش بتسمعينى . . إنتى مش سامعه أى حاجة
غير صوت نفسك وصوت غلك . . إنتى عميتى
عن كل شىء .

نعمت : (مخملق فيه . . تنظر من خلاله كأنها لاتراه) نفسى ألاقى
تريباق للهوان .

(ينظر إليها فى بأس وحيرة ويشعر أنه كان يتكلم طول الوقت
وحده . . وأنها قد انغلقت على نفسها تماماً) .
(يستدير يبطء نحو الباب ويتسلل فى هدوء) .
(لا تشعر بانصرافه) .

(ما زالت تغتمم لنفسها وتكز على أسنانها) .

نفسى ألاقى تريباق للهوان .

(تنهار فى كرسيا . . تحفى وجهها فى كفيها . تخفت الإضاءة على
المسرح) .

(يدخل أحمد الشهاوى . . ثيابه مهوشة . . خطوته وهيته طفولية
ساذجة . . ونظراته مخالية الذهن والمعنى ، فى إحدى يديه
قصرية . . وفى الأخرى لوح اردواز . . نراه فى داخل دائرة من
الضوء تتحرك معه وباقى المسرح مظلم . . ونسمعه يردد كما يردد
الأطفال) .

أحمد : ز فتحة ز . . ر فتحة ر . . ع فتحة ع . . زرع . .

ك فتحة ك . . ت فتحة ت . . ب فتحة ب .

كتب . . أ فتحة أ . . ك فتحة ك . . ل فتحة ل .

أكل . . ض فتحة ض . . ر فتحة ر . . ب فتحة

ب ضرب .

(نعمت ترفع وجهها وتنظر إليه . . هى الأخرى فى هالة من الضوء
الخافت ، أحمد يتجه إلى ركن الغرفة ويقف أمام الشماعة . .
يضع القصرية ولوح الإردواز على الأرض يفتش فى جيوب
المعاطف والثياب . يدس يده متلصصاً فى جيب معطف من الفراء
لنعمت . . ثم يلتقط حافظة نقود) .

نعمت : (تمسح عينها وهى تتابع المشهد فى ذهول) تانى . . حاترجع تحط

إيدك فى جيوب الناس . . حاتبتدى تانى من أب تكور كل إلى

فات .

(أحمد يلتقط أوراق البنكنوت ويدسها في ثيابه في تلصص).

نعمت : اتولدت من تانى يا أحمد وحاترجع تعمل كل اللي عملته من جديد . إنت هو إنت

(أحمد يتفحص أوراق البنكنوت في شبق ساذج).

نعمت : (في مرارة) وأنا هي أنا زى ما بيقول توفيق .

لو رجعت تانى للغنى خارج أعمل كل اللي عملته . . خارج بنت الهوى .

(أحمد ما زال يفرغ كل الجيوب في جيوبه)

نعمت : صحيح . . لو اتولدت ألف مرة حاجبه مش حاقدر

أنساه . . أنا أدمنته . . أدمنت الغلط . . وأنت كان

أدمنت الغلط . . إحنا مجرمين بالأصالة يا أحمد .

ما كانتش صدفة إن إحنا وقعنا على بعض .

اللعنات بتنادى على بعضها م الأزل

من الأزل . . من الزمن القديم قبل ما نتولد . .

وإحنا بتنادى على بعض . . شىء مرعب مرعب .

(أحمد ما زال يتجول في الغرفة ويسرق كل شىء).

(يتحول لون المسرح إلى الأحمر الخافت ، ثم إلى الأحمر

الشديد ، ثم إلى الأحمر النارى المتأجج ، يلتفت كل منهما للآخر . . يتحركان نحو بعضهما حركة ساذجة كأنهما في حلم أوكابوس نظراتهما شيطانية . . أذرعهما ممدودة).

نعمت : (في غل) تعال أعذبك وتعذبني . . إحنا في

الجحيم . . من زمان في الجحيم . . بنطلع من جحيم نخش في جحيم وبعدين نطلع تانى من جحيم نخش في جحيم .

باقتلك وتقتلنى . . لو نحدث ألف حياة غير حياتك

حماقتك كل مرة وتقتلنى لأن إحنا الاثنين قتالين

قتلا . . أخيراً بدأت أفهم .

(يتشابكان كأخطبوطين في نار حمراء . . ينجق كل منهما

الآخر . . وينحصرجان)

(حشرجات الموت)

(نخفت الأنوار) . .

(ظلام الختام) . .

الرجل

(قصة قصيرة)

أبى رة ...

... ..

... ..

... ..

... ..

... ..

... ..

العيد . . مدينة الملاهي . . بالونات ملونة تتشابك فوق
المرءوس . . الأطفال في ملابسهم الجديدة كباقات الورد . .
صوت البلب والزمامير مع أزيز العجلة الكبيرة الدوارة وهي تعلو
بركابها ثم تهوى دفعة واحدة فترتفع الصرخات والضحكات
ويتشبث كل راكب بالآخر في خوف . . أفواج أخرى تنتظر
دورها لتركب الخيول الخشبية . . صوت البنادق في ألعاب
الحظ . . الأراجيح . . الساحر الذي يقطع المرأة نصفين ثم
يعيدها كما كانت . . الموتوسيكل الذي يمشى على الحائط . .
المنوم المغناطيسي الذي يقول لك كم قرش في يدك . . قوارب
البط في البركة السحرية . . الفيل القطن الذي يرقص الباليه
ويقف على رجل واحدة ويمد يده ليأخذ البقشيش . . صينية
الكشري يتسابق حولها الأكلة . . ضحكات وفرقعات في كل
مكان . . وطفل يبكي يمد يده إلى شيء وأمه تنهره . . فيعود يمد
يده مشيراً إلى الباب . . حيث يدخل رجل عليه مهابة . .

تتلفت العيون في استصطالاع . . لاشيء غير عادي في الرجل . .
ولكنه مع ذلك يستوقف العين . . يمشي بخطوة ثابتة نحو
إحدى الأراجيح ويزجر الأطفال ويطردهم منها . . وما تكاد تمر
لحظات حتى ينقطع جبل الأرجوحة وتسقط على الأرض محدثة
دويًا شديدًا . . ولكن حمدًا لله لم يصب أحد . .
يذهب الرجل إلى صينية الكشري التي يتجمع حولها
الأطفال فيدلقها ويقلبها على الأرض ويدلق الأطباق من يد
الأطفال . . تبدو الآنية مغطاة بالجنزار الأخضر ويقبل مفتشو
الصحة فيأخذون الآنية والأطباق في أحراز ويعتقلون البائع الذي
يبيع طعامًا مسمومًا . . يغمى على أحد الأطفال . . فيمسح
الرجل على رأسه فيشفي . . يقف بين اللاعبين في لعبة الحظ
ويساهم في كل الألعاب فيكسبها جميعًا ولكنه يرفض أن يأخذ
مكافآته بصوب البندقية نحو البطات الورقية السابحة فيصيبها
جميعًا ولكنه يرفض أن يأخذ جوائزه وإنما يقول في هدوء دعوني
أختار جوائزى ثم يصوب البنادق نحو زجاجات الخمر الثمينة على
الأرفف فيحطمها جميعًا ويمضى دون كلمة تلاحقه نظرات
الدهشة والأفواه الفاغرة. والألسن التي عقدها الخرس . . وكلها

تساءل . . من يكون . . من يكون ذلك الرجل . . من يكون
صاحب هذا الوجه المهيب . .
يتجه في خطوة ثابتة نحو المنوم المغنطيسي فيقتله بضربة
واحدة ويرفس بضاعته فتتناثر على الأرض بضع لفافات من
الأيون والهيوين والكوكابين . . يخلع عن وجه القتل قناعه
فيهتف ضابط البوليس وهو ينظر في وجه القتل . . إنه
كارلوس . . إنه كارلوس اللعين الذي دوخنا ويهتف صوت
آخر . . عليه مائة وعشرين سنة أحكام سجن . . لقد هرب
أخيرًا . . لن يستطيع أحد تسليمه للقضاء . . فيجيب الرجل :
بل قد ذهب أخيرًا إلى حيث لا مهرب . .
وصرخ صوت أجش من خلفه . . النجدة . . النجدة . .
البوليس - حافظة نقودي بها ألف جنيه . . لقد نشلوني . . لقد
نشلوني . . النجدة . . النجدة . . وصرخت امرأة مولولة . .
أسورنى الذهبية . . وصرخت أخرى . . ساعتى . . وصرخت
ثالثة . . خاتمى . . وصرخت رابعة حقيبة يدي . .
وتلفت الرجل في الوجود خلفه وجذب بائع اليانصيب من

قيصه وأخرج المسروقات من المخلاة التي يضعها على كتفه وألقى بها إلى أصحابها وسلمه للبوليس .

وانتشر خبر الرجل الذي يصنع المعجزات . . والذي يستطيع أن يفعل أى شىء . . وقال صاحب مدينة الملاهى . . إنه يعمل عندى . . ونظر مسروراً إلى التزاحم على الشباك وإلى التذاكر التي تضاعف بيعها عدة مرات وشعر بالسعادة لأنه أحسن استغلال الموقف وعاد يهتف . . إنه يعمل عندى . . إنه يعمل عندى . . إنه نمره إيطالية . . فإذا بيد طويلة تمتد من داخل مدينة الملاهى وتنتزعه من على الباب وتلقى به فى بحيرة البط وصوت الرجل يجاوبه . . بل أنت الذى تعمل عندى . . أنت نمره الليلة . .

وراح الرجل يسبح فى الماء وهو يلهث وأخرج رأسه المبتلة بالماء فامتدت اليد الطويلة لتغط الرأس فى البحيرة .
وجاء صوت الرجل . . ألم تقتل أدريانو البهلوان وتأخذ زوجته . . ألم تكن تناصف كارلوس أرباحه من المخدرات . . قال صاحب مدينة الملاهى وهو يلهث اختناقاً . . نعم . . فدفع

بالرأس تحت الماء حتى كفت الأرجل عن الارتعاش ولفظ الجسد أنفاسه . . وقال : فذلك جزاؤك .

وانعقدت الألسن من الدهشة وبهت الوجود من الدهول وفكر كل واحد فيما فعل وفيما يفعل من موبقات وخطايا وولى الكثيرون الأدبار خوفاً من الفضيحة . . وأطلق آخرون سيفياتهم للريح خوفاً من الانكشاف والعقاب . . ونسيت الأمهات الحائثات أطفالهن وأسرعن بالهرب . . وترك الأزواج الزناة أولادهم وهربوا . . واختفى السكبيرون والقتلة واللصوص والمرثشون . . وخلت المدينة إلا من أطفال رضع . . حتى جنود البوليس استقلوا عرباتهم وهربوا . . ولم يبق إلا رجل يبكي تحت شجرة . . وامرأة تتحجب وفى يدها عقد قل .

قال الباكى يشكو حظه حينما علم بأمر صانع المعجزات : إني أحب وأتعذب فهل أجد عندك مخرجاً ؟

وقالت المرأة : أنا أحب وأتعذب . . فهل أجد عندك حلاً ؟ قال الرجل فى أسف . . فتلك هى المملكة التي حرمها على رنى . . لا أستطيع أن أدخلها . . تلك مملكة القلب . . فقد أراد الله الإنسان حرّاً فيما يحب ويكره . . لا قهر لأحد على

قلبه . . . ولا يستطيع سلطان أن يلوى قلبه على غير ما يريد فتلك
هي الأمانة التي حملها الله للإنسان . . . وهي مناط الحساب
ومنطقة المساءلة . . . اعذروني . . . هذا أمر لا حيلة لي فيه . . . أنتما
وشأنكما . . .

واختفى الرجل . . .
وعاد الاثنان يبكيان . . .

البرخ

(قصة قصيرة)

ألقى الرجل نظرة خاطفة على ساعة يده . . وانفلتت منه
شهقة ذهول :

هل هذا ممكن . . عشر ساعات مرت بهذه السرعة وهو
جالس محمق في لا شيء . . انقضى النهار في سرحة شاردة . .
أم أن عقارب الساعة أصابها تلف وانفلتت من ضوابطها
وراحت تهول في رقصة مجنونة عبر الميناء .

ولكن العقارب تشير إلى وقت الغروب . . وها هي ذي
الشمس تغرب بالفعل . . وهذا أذان الغروب يأتي مع النسمات
الواهنة .

هل أفلتت الشمس هي أيضا من فلكها وراحت تهوى إلى
الأفق بسرعة مجنونة . . أم أن الأرض انطلقت من لجامها
وراحت تدور حول نفسها بسرعات مضاعفة كمجذوب يدور
في حلقة زار .

إنه يذكر أنه ألقى رأسه إلى الوراء وأغمض عينيه مجرد

إغماضة ، واسترخى في جلسته ، وأخذ نفسًا طويلًا من
سيجارته . . . وراح ينفثه في هدوء . وكانت الساعة الثامنة
صباحًا بعد فطور دسم . . . ثم فتح عينيه .

فتح عينيه : فإذا شمس تغرب . وظلام يزحف ونسمة
باردة تدغدغ الأطراف . . . ولكن طعم شاي الفطور مازال في
فه . . . وكوب الشاي مازال مليئًا إلى منتصفه . . . والشاي مازال
ساخنًا . . .

يا إلهي . . . هل هذا يعقل ؟ !
هل هذا ممكن . . . ؟ !
أن يضاعف الزمن من سرعته فجأة !
وأن يهول العمر في إيقاعاته فيطوى النهار والليل في
لحظات .

وتحسس وجهه . . .
وارتجفت أنامله . . .
لقد طال شعر ذقنه بالفعل ، برغم أنه يذكر أنه حلقة مع
الفطور .
هكذا في لحظة . . .

وحانت منه التفاتة إلى الساعة فوجدتها منتصف الليل .
لقد هرولت العقارب في هذه الثواني القليلة فابتلعت الليل .
وغطى عينيه من الرعب . . .
وحينما كشفها كانت الشمس تغمر الشرفة . هكذا في
لحظات .

انطوى النهار وانقضى الليل وبزغ الفجر وأقبل ضحى يوم
جديد . . . كل هذا توالى في لحظات وقفز من الكرسي في دعر
وراح يتجول في الغرف .

هل هو مجنون ؟ !
هل اختل جهازه العصبي فجأة ، فأصبح يرى أشياء
لا وجود لها .

ولكن نبات البنفسج في أصيص النافذة أخرج زهرًا . . . في
هذه الساعات القليلة أخرج زهرًا ، إن مساحة اليوم كما كان
يعرفه في الماضي أصبحت تحتوى على أحداث شهور . . .
وأصبحت الأم تحمل وتلد في يوم . . . والجنين يصل إلى البلوغ في
أسبوعين . . . ويبلغ الرشد في شهر وتدركه الشيخوخة في
شهرين ، ويبلغ أرذل العمر قبل عام .

وخرج يجرى كالمجنون في الشارع . . .
لاحظ أن كل الناس قصار كالأقزام . . . وأن البيوت
والعمارات والبنائيات والمساجد والمآذن صغيرة . . . وكأن ما يرى
أشبه بما كيت معمارى لمدينة خيالية من علب الكرتون .

ومسح على نظارته .

ثم ألقى بها بعيدا في دعر .

لا . . . ليست النظارة . . .

إن ما يراه حقيقة لا مرآة فيها .

وهذه شوارع القاهرة . . .

وهذه فنادقها . . .

وهذا نيلها . . .

ولكن ما للشوارع رفيعة . . . وما للنيل ضيق وصغير

ورفيع . . .

وما للفنادق وكأعما هي نماذج فنادق صغيرة . . .

وما للناس كحشود النمل الصغير وكأنه يراهم من طائرة .

وهل هو أيضا صغير مثلهم ؟ !

وقف أمام محل للمرايا ونظر في مرآة بطول الباب . . . ولكنه

لم يره وجهها ولا جسما . . . ولم يره انعكاسا في زجاج المرآة .
اندفع إلى العمال يسألهم ولكنه لاحظ أنهم لا يرونه
ولا يسمعونه .

وأدرك الحقيقة الهائلة فجأة . . .

إنه لم يعد موجودا بالنسبة لهذا العالم !

إنه الآن في عالم آخر ، له قوانين أخرى . . . وإيقاع زمني

مختلف . . . اليوم فيه ستة . . . وهو من مكانه في هذا العالم يرى

الدنيا ويتابعها ويسمعها ويشهدها . ولكن كما لو كانت نموذجًا

مصغرا من بعيد . . . يتعاقب فيه الليل والنهار بسرعة . . .

وسكان هذه الدنيا لا يرونه ولا يسمعونه . . . ولكنه يراهم

ويسمعهم . . .

أسرع كالمجنون إلى بيته فوجد زوجته التي كان يخونها تخونه في

فراشه مع أحد خدمه . . .

اندفع في هياج مجنون يضرب الجسمين العاريين بقبضتيه .

فجاوبته ضحكات خليعة من المرأة ومزاح ماجن من عشيقها . . .

ولاحظ أن يديه تنفذان في اللحم دون أن يشعر بهما وكأنها يدان

شبهيتان . . . صرخ . . . لم يلتفتا إليه ولم يسمعا . . . واستغرقا في

ما هم فيه من مجون فاجر . . . وتجدد في مكانه من المهانة
والألم . . . ثم خلع قدميه وانسحب من هول المنظر .
أسرع إلى أولاده الذين سرق وارتشى واختلس من أجلهم
فوجدهم يلعنونه ويشتمونه ويذكرونه في سخرية .
ذهب إلى المرأة التي عبدها حباً طول عمره . فسمعها بأذنيه
وهي تميل بشعرها على رفيقها الجالس إلى جوارها في العربة
البويك الجديدة ، العربة التي أهداها لها منذ أيام ودفع ثمنها من
دمه .

سمعها بأذنيه تقول عنه لرفيقها :
- كنت أكرهه . . . وأشمئز من رائحة فمه الكريهة . . . كان
شيئاً كالكابوس في حياتي . . . لكم استرحت بموته .
إذن فهو قد مات . . .
وهو الآن ميت . . .
أو هو حي الحياة الأخرى في البرزخ . . . حيث يرى ويسمع
ولا يراه أحد ولا يسمعه . . . وحيث يشاهد أعماله ويعاشر ذنوبه
حتى تقوم الساعة . . .
وسمعها تقول وهي تتنفس في ارتياح :

- لم أكن أتصور أن يقتله السم بهذه السرعة !
إذن فقد قتله أيضاً . . . وبالسم !
وضعت له السم في كوب الشاي الذي شربه على الفطور . . .
آخر ما شرب في الدنيا . . . وما زال الكوب ملاًنا لمتصفه ودافئاً .
وقد أدركته شبه إغماءة وألقى رأسه إلى الوراء وأغمض عينيه
وأسلم الروح . . . ثم فتح عينيه على هذه الحياة البرزخية العجيبة
حيث يتابع بسمعه وبصره كل شيء . . . وحيث تتعاقب المشاهد
على عينيه وكأنها وخزات من نار .
وسمعها تقول وهي تلف خصلات شعرها حول عنق الشاب
الأنيق :

أخيراً . . . استرخنا من هذا الخنزير .
أخيراً يا حبيبي أصبحت لك .
ما أجملك . . .
وكانت الكلمات تخرق صدره كأسياخ من الحديد المحمى .
وكان يتلوى ويصرخ . . . ولا أحد يسمعه .
وأدرك أنه مقبل على عذاب لا ينتهي .
وتكوم في قبره وأخفى رأسه بين رجليه ودفن نفسه في التراب

وتمنى من فرط الندم لو أصبح تراباً من تراب .
ولكن في أعماق التراب كان يسمع ويرى أعماله . . . وكانت
الكلمات تنخس أذنيه .
أخيراً استرحنا من هذا الخنزير .
لكم كان رجلاً دنيئاً .
أخيراً يا حبيبي أصبحت لك . . .
انزاح الكابوس من حياتنا إلى الأبد .
ولكن الكلمات كانت تنخس أذنيه .
دفن أذنيه في التراب أكثر فأكثر . . .
ولكن لا خلاص .

صدر للمؤلف

- ١ - الله والإنسان : مجموعة مقالات كتبت في صيف ١٩٥٥ .
- ٢ - أكل عيش : مجموعة قصص قصيرة كتبت بين ١٩٥٣ - ١٩٥٤ .
- ٣ - عنبر ٧ : مجموعة قصص قصيرة كتبت بين ١٩٥٥ - ١٩٥٧ .
- ٤ - شلة الأوس : مجموعة قصص قصيرة كتبت بين ١٩٦٢ - ١٩٦٤ .
- ٥ - رائحة الدم : مجموعة قصص قصيرة كتبت بين ١٩٦٥ - ١٩٦٦ .
- ٦ - إبليس : دراسة كتبت في عام ١٩٥٧ - ١٩٥٨ .
- ٧ - لغز الموت : دراسة كتبت في عام ١٩٥٨ - ١٩٥٩ .
- ٨ - لغز الحياة : دراسة كتبت في عام ١٩٦٧ .
- ٩ - الأحلام : دراسة كتبت في عام ١٩٦١ .
- ١٠ - أينشتين والنسبية : دراسة كتبت في عام ١٩٦١ .
- ١١ - في الحب والحياة : مجموعة مقالات كتبت بين ١٩٦١ - ١٩٦٦ .

- ٢٨- اعترافات عشاق : مختارات من رسائل القراء بين ١٩٥٦ - ١٩٦٦ .
- ٢٩- القرآن محاولة لفهم عصري : دراسة كتبت في شتاء ١٩٦٩ .
- ٣٠- رحلتي من الشك إلى الإيمان : دراسة كتبت في عام ١٩٧٠ .
- ٣١- الطريق إلى الكعبة : رحلة حج كتبت في عام ١٩٧١ .
- ٣٢- الله : دراسة كتبت في أوائل ١٩٧٢ .
- ٣٣- التوراة : دراسة كتبت في أوائل ١٩٧٢ .
- ٣٤- الشيطان يحكم : مجموعة مقالات كتبت بين ١٩٦٥ - ١٩٧٠ .
- ٣٥- رأيت الله : دراسة كتبت في صيف ١٩٧٣ .
- ٣٦- الروح والجسد : مجموعة مقالات كتبت في شتاء ١٩٧٣ .
- ٣٧- حوار مع صديق الملاح : مجموعة مقالات كتبت في مارس ١٩٧٤ .
- ٣٨- الماركسية والإسلام : صدر عن دار المعارف في فبراير سنة ١٩٧٥ .
- ٣٩- محمد : صدر عن دار المعارف في يوليو ١٩٧٥ .
- ٤٠- السر الأعظم : صدر عن دار المعارف في ديسمبر ١٩٧٥ .
- ٤١- الطوفان : مجموعة قصص ومسرحيات قصيرة يناير ١٩٧٦ .
- ٤٢- الأفيون : سيناريو وحوار مارس ١٩٧٦ .
- ٤٣- الوجود والعدم : دراسة سنة ١٩٧٧ .
- ٤٤- من أصرار القرآن : دراسة سنة ١٩٧٧ .
- ٤٥- لماذا رفضت الماركسية : دراسة سنة ١٩٧٦ .
- ٤٦- نقطة الغليان : مجموعة قصص قصيرة ١٩٧٧ .

- ١٢- بوضيات نص الليل : مجموعة مقالات كتبت بين ١٩٦٦ - ١٩٦١ .
- ١٣- المستحيل : رواية كتبت في عام ١٩٦٠ .
- ١٤- الأفيون : رواية كتبت في عام ١٩٦٤ .
- ١٥- العنكبوت : رواية كتبت في أوائل عام ١٩٦٥ .
- ١٦- الخروج من الثابت : رواية كتبت في أوائل عام ١٩٦٥ .
- ١٧- رجل تحت الصفر : رواية كتبت في عام ١٩٦٦ .
- ١٨- الإسكندر الأكبر : مسرحية كتبت في صيف ١٩٦٣ .
- ١٩- الزلزال : مسرحية كتبت في صيف ١٩٦٣ .
- ٢٠- الإنسان والظل : مسرحية كتبت في عام ١٩٦٤ .
- ٢١- غوما : مسرحية كتبت في شتاء ١٩٦٨ .
- ٢٢- الشيطان يسكن في بيتنا : مسرحية كتبت في أبريل ١٩٧٣ .
- ٢٣- الغابة : رحلة إلى أفريقيا الاستوائية كتبت في أكتوبر ١٩٦٣ .
- ٢٤- مغامرة في الصحراء : رحلة إلى الصحراء الكبرى في صيف ١٩٦٩ .
- ٢٥- المدينة (أوحكايات مسافر) : مجموعة سفرات إلى أوروبا بين ١٩٥٦ - ١٩٦٨ .
- ٢٦- اعترفوا لي : مختارات من رسائل القراء بين ١٩٥٦ - ١٩٥٩ .
- ٢٧- ٥٥ مشكلة حب : مختارات من رسائل القراء بين ١٩٦٠ - ١٩٦٦ .

- ٤٧- عصر القروى : دراسة كتبت في يناير ١٩٧٨ .
- ٤٨- القرآن كائن حتى : دراسة في يناير ١٩٧٨ .
- ٤٩- أكذوبة اليسار الإسلامى : دراسة كتبت في أغسطس ١٩٧٨ .
- ٥٠- نار تحت الرماد : مقالات كتبت في ١٩٧٩ .
- ٥١- المسيح الدجال : مجموعة قصص قصيرة كتبت في ١٩٧٩ .
- ٥٢- أناشيد الأمم والبراءة : ١٩٨٠ .
- ٥٣- جهنم الصغرى : مسرحية ١٩٨٢ .

• مجموعة المؤلفات الكاملة •

صدرت في بيروت عام ١٩٧٢	قصص مصطفى محمود
صدرت في بيروت عام ١٩٧٢	روايات مصطفى محمود
صدرت في بيروت عام ١٩٧٢ .	مسرحيات مصطفى محمود
صدرت في بيروت عام ١٩٧٢ .	رحلات مصطفى محمود

حازت رواية «رجل تحت الصفر» على جائزة الدولة لعام ١٩٧٠

١٩٨٢/٤٢٦٨	رقم الإيداع
ISBN 997-02-0194-X	الترقيم الدولى

١/٨٢/٦٤

طبع بمطابع دار المعارف (ج. م. ع.)

نمّ الحافوة للرفع بواسطه

مكتبة عمك

ask2pdf.blogspot.com